

I ranèr äd Cavagneria

Peppino Casali

In fònd a cäl büdè cäs čiama via
indè agh cumincia'l portigh cun dù culunèt,
da Strà Növa äs và in Cavagneria
una piasèta bèla mè un quadrèt:

äl Dòm mé un unbrelòn agh fa l'umbria,
quand piöva gh'è 'l portigh pr'i banchèt
e se l'aria la's fa brüsca gh'è l'usteria
clä tä scalda cun un pècàr o un cichèt;

pär cunpletà däl quadàr l'armunia
mètumagh dù o tre dòn n cun i carèt
che setà insim'un banchin – l'è no bùsia –
pèlav'n'i ran cun un curtlin fät a falcèt.

Lur, pori bestiö, i-ér'in arlia,
propi li i-tiravan i... calsèt
pär cunténtà i pòvar e la siùria
cun la frità o in ümid in sguàsèt.

Adès lla guardi pö scapi via,
gh'è pü i ranèr – lla disi cun rispèt –
tütt quel agh gh'è restà'd Cavagneria
l'è 'l ricord d'una piasèta bèla mè un quadrèt.